

One Happy Island Lions Club a colecta 475 bril uza na opticanan di Aruba



DESDE 1990 Lions International por medio di clubnan Lions y Leo mundialmente den e programa yama “Sightfirst” ta yuda combati ceguera prevenibel y reversibel of ta asisti esnan ciego y visualmente incapacita.

Na Aruba, One Happy Island Lions Club y Delta Aruba Leo Club ta haci esaki cu cooperacion di tur Optica na Aruba. Den tur optica tin un buzón di Sightfirst di Lions International unda despues cu bo a haya bo bril nobo, por deposita bo bril uza. E aña aki nos a logra recolecta 475 bril cu a wordo manda pa paisnan den necesidad unda e monturanan y glasanan aki por wordo recicla y por yuda persona nan den necesidad.

Localmente One Happy Island Lions Club ta coopera tambe na peticion individual ricibi pa ayudo cu bril.

Un danki immenso ta bay pa Kok Optica, Optica Moderna, Optica Leslie, Perle Vision Aruba, Optica Perfect Vision, Sun & Shade Optica.

Biblioteca Nacional Aruba ta haya un otro obra di un artista visual pa su coleccion

Esta di sr. Ephraim Britten



EPHRAIM R. Britten a namora cu pintamento tempo cu e tabata chikito. Y semper el a sigui siña pa perfecciona su arte y engrandece su conocimiento di arte. Un y tur ta aprecia y adora su obranan. Nan tin un estilo unico, bo ta reconoce un obra Ephraim Britten di biaha. Su ultimo proyecto grandi tabata pa Museo Arqueologico Aruba. Un serie di obra cu e historia di Aruba como tema principal.

Ephraim Britten ta exhibi e cuadro ‘Warawara’ na biblioteca como arte publico. Un obra cu un expresion mistico, esoterico y ingenua. Y un simbolo fuerte, esta e Warawara den composicion. Talbes e Warawara ta trece un mensahe di e mundo spiritual? Un composicion cu ta hiba bo den un otro epoca, un otro realidad y un tempo perdi.

Ephraim Britten a nace na Aruba, dia 20 di october 1967 y na 1988 Ephraim a exhibi su obranan na Biblioteca Nacional Aruba. Na 2004 Britten a tene un exposicion na Instituto di Cultura. Den añanan nobenta Ephraim Britten a pinta diferente imagen pa stampia riba peticion di Post Aruba.